

四庫全書

子部

欽定四庫全書

子部

類說卷二十三

詳校官中書_臣張勉成

員外郎_臣牛勣文覆勘

總校官檢討_臣何思鈞

校對官編修_臣盧遂

謄錄監生_臣王宮

欽錄四庫全書

類說目錄

卷二十二

荆湖近事

酒囊飯袋

老婦嫁詩

舜作蟒蛇

僧是詩家奴

散福裙

存孤恤寡

大市裏賣平天冠

謁戍將致詞

詠柳

鷺鷥詩

安知獲麟之筆為騎馬之用

鄧公池亭

傳語縣君謝到

白傅琵琶行

五臟穀

一縫毬

金坡遺事

玉堂之署

大雪賜詩

御樓侍立

黃盤鵬

江南圖畫

太宗押勅

破鑊檢舊章

一灰堆

御筆戒酒

門扉下竊出

靈鵲

弟拜相兄草麻

狡兔三穴首鼠兩端

不可令周翰知

留請假榜子

東齋記事

朕有三條帶

賞花釣魚

賦山水石歌

夢召對

武臣不持喪

議藥不合

賦落韻

富人納貴絹

乖崖表德

千林如有喜

以制誥為贊卷

狀元給賜從

夢明憲下草制

劉輝作狀元

百日宰相

蔡君謨蛇精

司天奏侍臣逃

黃筌畫

寫生趙昌

十眉圖

鮑魚緣木

二鵲擲卵

徵風

庭松詩

雙廟

立朝以曾魯公為法

好把長鞭便一揮

一聲河滿子

費鐵嘴

文如錦綉屏風

官家隣人

作漢春秋硯

宣獻未嘗素談

不足則誇

薛出油

水晶燈籠

照天蠟燭

放生

禁食蝦蟆

預買綢絹

體備中和之氣

疥有五德

鐵碁

荔枝熟

保心如止水

灰牛白馬

勸酒當以量

契丹風俗

改罪已辭

趙均平

孝猿傳

蜀茶

物理相感

漢似胡人胡似漢

鐵林騎

類說目錄

欽定四庫全書

類說卷二十二

宋 曾慥 編

荆湖近事

酒囊飯袋

馬氏奢僭諸院王子僕從烜赫文武之道未嘗留意
時謂之酒囊飯袋

散幅裙

周行逢為武安節度婦人所著裙皆不縫謂之散幅

或曰裙之於身以幅多為上周匝於身今使開散是不周也不周不縫是姓是名俱去矣夫幅者福也福破散其能久乎未幾而行逢卒

老婦嫁詩

曹衍撰馬氏野史投進年已衰耄獻老婦嫁詩云滿頭白髮為新婦笑殺年少豪家兒又詠鷺鷥云終日灘頭延頸望能消大海幾多魚

存孤恤寡

周行逢命何景山為益陽令強取人家婦人景山曰
卑吏無它蓋存恤孤寡行逢曰何不寬其賦稅免其
徭役乃置之於家於理安乎戲謂僚吏曰不如令佐
海龍王去遂投於江中

舜作蟒蛇

呂夔遊舜洞見一古碑謂舜曾於此洞作蟒蛇身受
諸苦惱不知其幾世至隋仁壽中遇一尼摩頂受記
遂得託生夔曰悠悠蒼天彼何人斯妄為玷瀆如此

之甚聖莫大於堯舜暴莫大於桀紂安得桀紂至暴
寂然無聞至聖反為蟒蛇又尼者一髡跣婦人有何
功行摩頂受記使之託生耶由是著解分篇千餘言
大市裏賣平天冠

廖融詩云遠山秋帶雨水館夜多風潘若沖陽朔縣
詩云門連百越水地管數千峯郭影雲連樹林聲月
帶春二人更唱迭和詩家之勁敵太宗懲五代場屋
之弊以詞賦策論取士融冲之徒稍稍引去融曰豈

知今日之詩道一似大市裏賣平天冠並無人問耶
又素性重僧前後贈詩甚多或問其故融曰僧是詩
家奴一人贈一篇且圖帶往東西南北去耳

僧是詩家奴

附見上

謁成將致詞

林楚材窮窘益陽成將李著謂林曰大凡秀才必能
道言語何不向我身上道一兩句楚材觀其額上耳
後皆雕火珠雲雁即致詞曰伏以太保氣貌雲橫身

材筆直兩行秋鴈於耳畔以斜飛一顆明珠當額頭
而突起著大喜厚贈之

咏柳

狄煥詠柳云翠色折不盡離情生更多登凝碧亭詩
數點分秋霽不知何處來

鷺鷥詩

張仲達咏鷺鷥詩云滄海獨深處鱸魚銜得時張文
保曰佳則甚佳爭奈鷺鷥嘴太長也

安知獲麟之筆為騎馬之用

孫光憲為荆南幕府常慕史氏之作每曰安知獲麟
之筆盡為騎馬之用因吟劉禹錫詩云一生不得文
章力百口空為飽暖家

鄧公池亭

孫逢吉遊鄧公池亭問創置之由云馬氏諸公子舊
園逢吉留詩曰馬家公子闢亭臺斷斷山根碧沼開
啼鳥不知人事變數聲猶傍水邊來

傳語縣君謝到

李戴仁性迂緩非禮勿動娶閻氏年少與之異室私約曰有興則見忽一夕聞扣戶聲小豎報云縣君欲見大監戴仁遽取百忌歷燈下看之大驚曰今夜河魁在房不宜行事傳語縣君謝到閻氏慚怒而去

白傅琵琶行

李守愚聞人誦白傅琵琶行笑曰此婦本長安娼女嫁茶商在外而居易輒於夜中移船就之聽其琵琶

以佐歡得非姦狀顯然耶

五臟穀

李守遇取黑豆緊小而圓者侵晨以井花水吞二七粒謂之五臟穀到老視聽不衰

一縫毬

徐博世為皮匠能為一縫毬晚為道士能導引握拳置口中或反手抱柱身隨起而足直上太祖召見曰臣能走乃脫履於殿庑走二十匝而出入之息如故

金坡遺事

玉堂之署

太宗謂宰臣曰蘇易簡告朕乞御飛白書玉堂之署
四字令付宰臣李助以下來於中書堂面宣賜

大雪賜詩

太平興國七年季冬大雪上賜學士詩曰輕輕相亞
擬如酥宮樹花裝萬萬株今賜酒鄉詩一盞玉堂閒
話道情無

御樓侍立

唐制玉樓賜敕學士得升丹陽樓侍立五代以後因循廢之蘇易簡奏自今上御樓覃恩與樞密使侍立御榻之側

黃盤雕

舊規云十月初別賜錦長襖子國初以來賜翠毛錦太宗改賜黃盤雕

江南圖畫

太祖平江南所得圖畫賜學士院五十餘軸景德中
只有雨村牧牛圖無名寒蘆鳴徐熙筆五王飲酪圖
周文舉筆

太宗押勅

陶穀實儀在翰林乾德二年范質等俱罷相命起韓
王登庸制下無宰相署勅穀云自古輔臣無虛位者
惟唐文宗甘露事後數日絕班當時僕射令狐楚鄭
軍奉行制書今南省官亦可署勅儀曰穀之所陳非

承平之事不足援據今皇弟開封尹平章事即宰相之任也太祖曰儀之言是也即命太宗署勅賜之

破鑲檢舊章

韓不能詩及入禁中不長應用一夕須詔書甚急韓停筆問吏索書舊章更以本典扃戶出宿不可搜檢丕乃破鑲取之改易而進

一灰堆

張洎博士多聞在江南將命入貢及還作詩十篇多

嘗詆京師風物有一灰堆之句以悅其主蘇易簡得其親書本後洎與易簡同為學士不協上前往往異同易簡云清河公若更相矛盾即將灰堆之句進呈矣洎聞之甚懼稍屈伏焉

御筆戒酒

蘇易簡嗜酒御筆戒之云卿若覆杯朕有何慮易簡承詔斷酒已而復飲上亦不責及參大政見上不復叙待但嚴顏色責更事而已故易簡詩什之中多思

禁林

門扉下竊出

寇準在中書多召兩制就第飲宴必閉闔苛留之畏
慎者甚懼李宗諤嘗於門扉下竊出得馬而走後為
脩宮使恩顧漸深一日召至玉宸殿賜酒宗諤堅辭
以醉且云日暮上令中使附耳語云此中不須從門
扉下出

靈鵲

院中有雙鵲栖於玉堂之後海棠樹學士會食必徘徊翔集或鳴噪必有大詔令感召之事因謂之靈鵲故晁翰林詩有却聞靈鵲心應喜并予詩云靈鵲先依玉樹栖蓋謂此也

弟拜相兄草麻

錢希白惟演從兄也惟演拜相希白當制世稱弟拜相兄草麻自古未有惟座主拜相門生草麻前代記之矣

狡兔三穴首鼠兩端

錢若水為學士太宗禮遇甚厚嘗草錫趙保忠詔云
不斬繼遷存狡兔之三穴潜疑光嗣持首鼠之兩端
上曰此四句正道着我意又與趙保吉詔有既除手
足之親已失輔車之勢上批其後云極好

不可令周翰知

梁周翰少有文譽及入禁林年已七十景德中答宰
相待罪表不稱旨上别令趙安仁撰曰不可令周翰

知恐其愧恨上聖德包容如此

留請假榜子

楊大年性剛頻忤上旨母在陽翟有疾遂留請假榜子與孔目吏中夕奔去上怜其才終優容之止除少分司仍許只在陽翟

東齋記事

朕有三條帶

錢俶進寶帶太祖曰朕有三條帶與此不同俶請宣

示上笑曰汴河一條惠民河一條五大河一條做大
愧服

賞花釣魚

三館惟直館預坐校理以下賦詩而退太宗時李宗
諤為校理作詩云戴了宮花賦了詩不容重見赭黃
衣無聊却出宮門去還似當年下第歸上即令赴宴
自是校理而下皆與會也

賦山水石歌

賞花釣魚賦詩往住宿製天聖中永興軍進山水石
因命賦山水石歌出於不意多荒惡者中坐優人入
戲各執紙筆若吟咏狀一人忽仆於石上曰日來作
賞花釣魚詩準備應制却被這石頭擦倒明日降出
詩令中書銓定內鄙惡者與外任

夢召對

蔡子直識英宗于藩邸後知州夢召對曰只在此更
無得去既寤乃靈駕發引之日因大慟哭終而卒

武臣不持喪

故事武臣不持喪韓玉以奏請持喪下兩制臺諫議
唐子方為諫官不欲令持喪曰今日不可高論也
叔勃然曰父母死令持服安得為高論夢得歎曰
俗人也率然一言亦中於理兩制臺諫竟為兩議而
遂詔崇班以上持服供奉官以下不持服是則官
宜者得為父母服官卑者則不為無官者將何以處之
議樂不合

司馬君實與予莫逆之交也惟議藥為不合

賦落韻

景德中李迪賈邊皆舉進士有名者試皆不與迪以
賦落韻邊以當仁不讓於師論以師為衆與注疏里
乃奏乞收王文正公為相曰迪雖犯不考然出於下
意其過可恕邊特立異說將令後生務為穿鑿破墮
科場漸不可啓遂收迪而黜邊

富人納貴絹

張尚書詠在蜀時米斗三十六文絹疋三百文公計
兵食外盡令輸米絹之餘者許貧民買之貧民頗不
樂今米斗三百絹疋三貫富人納貴絹而貧人食賤
米皆以當時價於官無所損益而貧富兩利蜀人懷
思不已

乖崖表德

張尚書守蜀人心大安及代去留一卷實封與僧正
云候十年觀次後十年薨于陳州訃至開所留文字

乃公畫像衣冠褐繫縑草裏自為贊曰乖則違俗崖
不利物乖崖之名聊以表德遂畫像于府治及寺觀
中

千林如有喜

薛簡肅舉進士時勢謁馮魏公首篇有囊書字自負
早晚達明君之句馮公曰不知秀才所負何事讀至
第三篇春詩曰千林如有喜一氣自無私乃曰秀才
所負者此

以制誥為贄卷

丁文簡嘗言舉進士時以制誥為贄卷復自笑曰是不揆也後為知制誥學士參政亦見其所存有素矣初舉人必以文卷贄先進自糊名後浸衰賈許公為中丞奏罷公卷而士子之禮都忘矣

狀元給騶從

祥符八年蔡文忠狀元及第上視其秀偉顧宰相曰得人矣因詔金吾給騶從傳呼狀元始此也

夢明憲下草制

孫夢得初名貫字道卿少舉進士夢登塔見持一大
文卷云春榜間有孫貫否曰無惟第三人有孫抃既
寤改名抃又至華陰詣金天王廟求夢夜夢明憲下
草制明年果第三人及第後知制誥嘗云某初得此
夢甚喜纔作翰林學士頗嫌之矣人心是無已也時
夢得已為參政俸祿差厚耳去學士亦不甚相遠但
清優不如學士而勞責過之

劉輝作狀元

有堂吏夢火山軍姓劉人作狀元明年狀元乃劉輝也

百日宰相

彭年深於術數一日報杜祈公拜相彭年曰百日宰相後其言驗彭年名壽

蔡君謨蛇精

蔡君謨知福州以疾不視事累夕每夢登鼓角樓而

睡通判恠鼓角匠不打三更者因對數夜大蛇盤據鼓上不敢近人遂以君謨為蛇精

司天奏侍臣逃

祥符中司天楊浩奏侍臣當有逃去者翌日楊文公以母疾不俟報歸陽翟初上欲立章獻為后公不草詔章獻既立不安乃託母疾而行

黃筌畫

黃筌黃居來居寶蜀之名畫手也尤善毛翎多養鷹

鵲觀其神俊以模寫之其後子孫有棄畫業而事田獵者既多養鷹鵲則買鼠以飼之其後又有捕鼠為業者人家置博奕之具者子孫必為博奕藏書者子孫無不讀書置業豈可以不慎哉

寫生趙昌

蜀有孫知微善畫山水仙官星辰人物學懷亦善山水毛翎趙昌善畫每晨朝露下遶欄諦玩手中調色自謂寫生趙昌人謂以手捫摸不為采色所阻乃真

昌畫也其為生菜折枝果尤妙又王有者漢州卒也
州將每令昌畫遣有供應以是有畫遂亞於昌

十眉圖

天慈寺壁畫明皇按樂十眉圖地有瑞草謂之錦地
張乖崖嘗令剗平之封其門戶後日開復生如故

魴魚緣木

蜀有魴魚善緣木有聲如啼兒孟子所謂緣木求魚
是亦未聞此也

二鵲擲卵

陵江上見二鵲擲卵相上下以接之蓋習其飛也其
胎教之意乎又翅羽未成躍出巢穴往往墜崖下死
其天性俊爽是亦躁進也

徵風

魚逆水而上鳥向風而立取其鱗羽之順也有徵風
知來觀鳥所向則可知矣

庭松詩

有式贊薛簡肅所業庭松詩云范前媒母陋雪裏屈
原醒公大稱之

雙廟

王質知蔡州毀吳元濟廟立秋仁傑李愬雙廟

立朝以曾魯公為法

或問王景彝立朝當以何人為法曰曾明仲然謹約
為近而嚴過之福壽弗逮也

好把長鞭便一揮

楊文公置酒招石中立資政絕句好把長鞭便一揮
石和曰尋常不召尤相造况是今朝得指揮其談諧
類此

一聲河滿子

元祐中有輕薄子以古人詩益成二十八字仲昌故
國三千里宗道深宮二十年殿院一聲河滿子龍圖
雙淚落君前龍圖王博文也一日對上說數歷之久
不覺淚下殿院蕭定基也與韓魏公諸公同發解舉

人作河滿子嘲之王宗道為諸宮講書二十年訴於
上求進用仲昌郇公從子論科場不公牒歸建州

費鐵嘴

故老能道蜀時事云天兵伐蜀蜀主大懼召廷臣募
所以拒天兵者費鐵嘴越班而出對衆謂鐵嘴不獨
有口才兼有膽勇諦聽之乃云是臣則斷定不敢於
是衆笑而退

丈如錦綉屏風

夏英公言楊文公如錦綉屏風但無骨耳議者謂英公文譬諸泉水迅急湍悍至於浩蕩汪洋不如文公也

官家隣人

太祖殿前慮囚有囚曰念臣是官家隣人太祖以為燕薊隣人遣問之云臣住東華門外太祖笑而宥之作漢春秋硯

胡旦作大硯可數尺鐫其傍曰宋胡旦作漢春秋硯

命埋塚中

宣獻未嘗素談

宋宣獻公未嘗素談在河南聚廳慮囚公曰汝與何人素有何冤囚不能對坐上官更以俗語問之囚始能答宋元憲公近之和氣拂拂然襲人景文公則英采秀發三人者久視之無一點塵神仙中人也

不足則誇

歐陽公每誇政事不誇文章蔡君謨不誇書呂濟叔

不誇慕何公南不誇飲酒司馬君實不誇清絕大抵
不足則誇也

薛出油

薛簡肅公尹京一切以嚴治人謂薛出油後知成都
俗好遊公作何處春遊好詩十首自號薛春遊欲換
前所稱謂也姜樞密遵魯肅簡公亦以嚴稱時目姜
為姜擦子魯為魚頭公

水晶燈籠

劉隨待制為成都通判嚴明通達人謂之水晶燈籠
照天蠟燭

田元均治成都有聲人有訴訟其懦弱不能自伸者
必委曲問之蜀人目之照天蠟燭又謂之不錯事尚
書

放生

曾魯公放生以蜺蛤之類渺活物命之多也一日夢
被甲者數百人前訴既寤乃有惠蛤蜊數簍者即放

之夜復夢被甲者來謝李景初家市一巨鼈景初未
知也夜夢皂衣姥來告乞命即遣放鼈亦夢姥來謝
禁食蝦蟇

沈文通知杭州禁食蝦蟇終二年人不敢食蝦蟇亦
不生及文通代去弛禁而復生如故此物理之不可
致詰者也

預買紬絹

太宗時馬元方為三司判官建言方春民乏絕時豫

給庫錢貨之至夏秋輸絹於官預買紬絹蓋始於此
體備中和之氣

仁宗暑月不揮扇以拂子毆蚊蠅而已冬月不御爐
鑒者云體備中和之氣則然

疥有五德

世言亦有五德不上面仁也喜傳於人義也义手揩
擦禮也生罅指節骨間智也癢必以時信也

鐵碓

鐵碇以鍛金銀雖百十年不壞以碇皂筴則一夕破
碎鞭以箠馬則愈久愈潤且堅紉以擊猫則隨節折
裂

荔枝熟

人未採則一切蟲不敢近人採則蟲鳥蝙蝠之類無
不殘傷者故採荔枝者日中而採之

保心如止水

張文孝公觀性沉靜未嘗行草書自咏詩云保心如

止水為行見真書人以為着題

灰牛白馬

契丹之先有一男子乘白馬一女駕灰牛相遇遂為夫婦生八男子前史所謂迭為君長者也契丹祀天至今用灰牛白馬

勸酒當以量

契丹有馮見善者予接伴勸酒見善曰勸酒當以其量若不以量如徭役而不用戶等高下也以此知契

丹徭役亦以戶等中國不量戶等役人耶

契丹風俗

契丹使者蕭慶言達怛人不粒食家養牧牛馬飲其乳亦不食其肉腹如筋雖中箭不死又言契丹牛馬有熟時一如南朝養蠶也有雪而露出草一寸許此時牛馬大熟若無雪或雪沒草則不熟

改罪已詞

仁宗時書詔未嘗改易慶歷七年春旱楊億甫草詔

既進上以罪已之詞未至改云乃自去冬時雪不降
今春大旱赤地千里天感朕勤以戒朕躬茲用屈已
下賢歸誠上叩冀高穹之降監憫下民之無辜與其
降疾於人不若移災於朕自今避殿減膳許中外實
封言事

趙均平

成都十邑惟新繁稅平初定稅時有姓趙者相地肥
瘠以為稅入輕重之數至今人謂之趙均平

孝猿傳

吉州有捕猿者殺其母之皮并其子賣于蕭氏後旬
日示以母皮跳躑號呼不食而卒蕭生為作孝猿傳

蜀茶

蜀中數處產茶雅州蒙頂最佳其生最晚在春夏之
交其地即書所謂蔡蒙旅平者也方茶之生雲霧覆
其上若有神物護持之

物理相感

世傳棘能辟霜蓬能辟沙物理相感也有蓬生處則
不聚花果以棘圍之則茂

漢似胡人胡似漢

狄青汾河人面有刺字不肯滅去為樞密使有以謠
讖告予者曰漢似胡人胡似漢改頭換面總一般只
在汾河川子畔予曰此唐太宗殺李君羨事上安肯
為之近世有以王德用貌類藝祖宅枕乾崗為言者
疏入不報卒亦無事其人語塞嗚呼前世如此被誅

者甚衆哀夫

鐵林騎

西邊呼鐵鷁子為鐵林騎

類說卷二十二

欽定四庫全書

類說目錄

卷二十三

博物志

崑崙山五色水

地以石為骨

物恠

山澤氣

和氣所生

妊娠避忌

生男法

取火

胎生卵生

守宮

續絃膠

常山之蛇

吳餘鱠

煉石斷鼃

后稷伊尹

千日酒

染髭法

積油生火

養生法

野葛

客星犯牛斗

殺長子

上藥中藥下藥

黃帝諸臣

寶劍

指佞草

天孫

蒿宮

山鷄

著

寶器

三人冒霧

食螭

駝知泉脉

猴獠名馬化

雲漢圖

太陽之草

虎撲毛

河精

諸物相似者

遠志

日月食

續博物志

天可倚杵

春雲秋風

商雲

墨兵

金條玉科

兔目

子規黃鳥

毛席氍毹

容成侯

大宅虎圍

鳩車竹馬

猊糖

金柝

壺郎

清盧

天心月脇

澤鶴

文王四乳

鳩杖

九寡

陽馬

八極

畫妖

物類相感志

靈夢

楓人

金銀汗

陰陽石

仙漿

九豫章

投酒於川

鼠重萬斤

嫁姑

觀日玉

玉火

香雲香雨

麝枕

龍鬚拂

樹化鴛鴦

蠲忿犀

瑟幕

宣室志

止戈龍

千年仙鹿

玉清三寶

見蝦蟇

柳將軍

錦半臂

紙月

架梯取月

月圓白瑤宮

諸葛後身

平生當食萬羊

夢捧日

虹蜺天使

韓退之見神人

白衣吟

月夜聯句

曹唐詩

黑龍甲中出

黃衣婦人乞命

玄陰池

清水珠

蟾蜍

玉龍膏

居士金精

稚川真君

已酉平蔡

七聖畫

謝翱詩

甌杵為妖

類說目錄

欽定四庫全書

類說卷二十三

宋 曾慥 編

博物志

崑崙山五色水

地南北三億三萬五千里地形高大者有崑崙山出
五色水流入中國名曰河地下有四柱三千六百軸
犬牙相牽

地以石為骨

川為脉草木為毛土為肉石者金之根

物恠

水石之恠曰龍罔象木之恠曰夔魍魎土之恠為犢
羊火之恠為宋無忌

山澤氣

玉山多雲鐵山多石山氣多男澤氣多女

和氣所生

和氣相感而生朱草山出象車澤出神馬陵出黑丹

阜出土恠江出大貝海出明珠人主壽昌天下太平
妊娠避忌

婦人妊娠不欲見醜惡物食當避異常味不可見兔
令兒唇缺不可啖薑令兒多指

生男法

婦人妊娠未滿三月著墍衣冠平旦左遶井三匝勿
反顧勿令人知必生男

取火

削木令圓舉以向日以艾承其影則得火

胎生卵生

九竅者胎生八竅者卵生

守宮

蜥蜴或名蝘蜓用器養之食以朱砂體盡赤所食
滿十斤搗萬杵點女人支體終身不滅唯房室事
則滅故號守宮東方朔奏武帝用之有驗鼠食巴
豆三年重三十斤

續絃膠

漢武帝時西海有獻膠者以注斷絃名曰續絃膠

常山之蛇

有兩頭觸其一頭一頭至觸其中則兩頭俱至孫武以喻善用兵者

吳餘鱠

吳王江行食鱠不盡棄其餘中流化為魚其長數

寸名吳餘鱠

煉石斷鼇

天地初不足故女媧煉五色石以補其缺斷鼇足以絕地維故天傾西北地不滿東南

后稷伊尹

思士不妻而感思女不夫而孕后稷生乎巨跡伊尹生乎空桑

千日酒

劉玄石於中山酒家沽酒酒家與千日酒忘言其節

度歸至家醉而家以為死葬之酒家計千日滿往視之云亡已三年于是開棺始醒俗云玄石飲酒一醉千日

染髭法

胡粉石灰以水和之塗髭鬚不白

積油生火

積油萬石自然生火秦始中武庫火積油所致也

養生法

皇甫隆遇青牛道士封君達云體欲常少勞無過食
去肥濃節酸醎絕思慮損喜怒慎房室

野葛

食之殺人家葛種之三年不收後旅生亦不可食

客星犯斗牛

有居海濱者每年八月見浮槎過甚大俟其復來裹
糧而登行十餘日忽至一處有城郭廬舍中多織婦
見一丈夫牽牛飲水此人問是何處答曰君還問嚴

君平則知之後問君平曰某年月日客星犯斗牛始知乃天河也

殺長子

越之東有駭沐之國其俗生長子則殺之名宜弟

上藥中藥下藥

上藥養命謂五石鍊形六芝延年也中藥養性謂合歡蠲忿萱草忘憂也下藥治病謂大黃除實當歸止痛也

黃帝諸臣

祝融造市高辛臣也蚩尤造兵炎帝臣也揮造弧夷
牟造矢倉頡造書容成造厯伶倫造律隸首造數皆
黃帝臣也儀狄造酒禹時人綿駒善歌齊人

寶劍

名純鉤湛盧豪曹魚腸巨闕五者皆歐冶子所鑄

指佞草

堯時有屈軼草生於庭佞人入朝則屈而指之又名

指佞草

天孫

泰山神曰天孫天帝之孫也主召人魂魄

蒿宮

周德澤盛蒿大可為柱名曰蒿宮

山雞

自愛其色終日映水目眩則溺死

著

一千歲而三百莖故知吉凶

寶器

繁弱之弓屈盧之矛鷄子之弩孤父之戈皆古之
寶器

三人冒霧

昔有三人同冒霧一人病一人無故一人死無故者
飲酒病者吃飯死者空腸

食蠋

荒年食蠋半斤支十日飢

駝知泉脉

燉煌西渡流沙千里無水沙下伏流惟駝知之每至泉脉則以足跑地掘之必得水

猴獮名馬化

蜀西南山中有物似猴長尺餘能人行名曰猴獮又名馬化行路遇婦人輒盜去以為匹偶無子終不還
有子輒送其家不養其子母輒死其子既長悉與人

同皆以楊為姓故蜀之西界多姓楊往往馬化之
子孫

雲漢圖

劉褒漢桓帝時人畫雲漢圖見者皆熱又畫北風
圖見者皆寒

太陽之草

天老曰太陽之草服之長生即黃精也

虎撲毛

羽氏國人有翼飛不遠有獸綠毛似豹毛可作筆名
虎撲毛

河精

夏禹行河見長人魚身曰我河精也

諸物相似者

魏文帝記諸物相似亂真者碓硃恠石似美玉蛇牀
亂靡蕪薺芄亂人參雌黃似石硫黃杜衡亂細辛百
步似門冬防葵似狼毒

遠志

苗曰小草芎藭苗曰江離

日月食

麒麟鬪而日月食鯨魚死而彗星出嬰兒號而母乳
出蠶咀絲而商絃絕

續博物志

天可倚杵

河圖記曰百代之後地高天下千代之後天可倚杵

春雲秋風

仲長統曰春雲為輿秋風為駟

商雲

京房易占曰雲二色曰商瑞雲也荀卿言雲友風子

雨

墨兵

孫樵謂史書曰墨兵

金條玉科

揚雄謂刑法曰金條玉科

兔目

槐生五日曰兔目十日曰鼠耳葉如此也

子規黃鳥

高唐賦子規一曰姊歸幽州方言黃鳥曰黃鸝

毛席羶鄉

後漢西域傳註羶鄉毛席劉孝儀謂狄曰羶鄉

容成侯

司空圖謂鏡曰容成侯金炯又曰壽光先生

大宅虎圍

枚叔總稱面曰大宅眉目間曰青陽王元長謂國子學曰虎圍

鳩車竹馬

王元長曰小兒五歲曰鳩車之戲七歲曰竹馬之游
猊糖

後漢顯宗紀註以糖作狻猊形號猊糖

金柝

潘岳謂刁斗曰金柝今之銅器也

壺郎

陸機賦掌漏官曰壺郎

清盧

揚雄謂目矐子曰清盧揚眉曰揚衡

天心月脇

皇甫湜稱奇丈曰穿天心出月脇

澤鶴

世說羊祜鎮荊州江陵澤中出鶴取以教舞甚馴
名澤鶴

文王四乳

春秋元命苞文王體四乳

鳩杖

續漢儀賜老人杖杖端刻鳩取其不噎

九寡

七發云孤子之鈎以為隱九寡之珥以為約取孤寡之物以裝琴要有悲聲九寡者九為寡婦也

陽馬

何平叔謂屋角梁曰陽馬

八極

鄒子曰中國者天下八十分之一有海環之如此者九又有大瀛海環之總曰八極

畫妖

後魏元兆能行治病有軍士女為物所憑兆曰天下
有至神之妖有至靈之妖有在陸之精在水之魅以
法治之乃黃化寺壁畫鬼崇

物類相感志

靈變

黃帝以靈變為鼓聲聞百里

楓人

嶺南多楓遇雷則癭長三五尺如人狀謂之楓人

金銀汗

凡山石盛夏必汗出赤而黃者金汗白而紫者銀汗

陰陽石

夷陵有陰陽石陰石常潤陽石常燥旱則鞭陰石

必雨雨久鞭陽石則止

仙漿

拘樓國有水仙樹腹中有水謂之漿飲者十日醉

九豫章

東方有九豫章一樹主一州上有九力士執斧伐之
以占九州吉凶行斫行復復遲者州伯病不復者
州滅亡

投酒於川

越勾踐出行有獻酒一壺者王曰吾獨飲若三軍何
乃投於川命一軍飲之皆沾醉

鼠重萬斤

北方有層冰厚百丈有鼠在土中食冰不食草木

重萬斤

嫁姑

茄子樹開花時取葉布於過路以灰圍之結子加倍謂之嫁姑

觀日玉

大如八寸鏡映日觀見日中宮殿曰日玉

玉火

唐東夷所貢色赤長如寸積之可以燃鼎置之室

中不復挾纊

香雲香雨

貝嶠爛石燒之煙為香雲徧空則下香雨

麝枕

置麝枕中可絕惡夢

龍鬚拂

元載得龍鬚拂置之堂室蚊蚋不敢入

樹化鴛鴦

宋韓朋妻美康王奪之妻自殺王埋之經宿生樹支
體相交王欲伐之化為鴛鴦飛去

蠲忿屏

唐公主有屏如彈丸帶之能蠲忿

琵琶

唐懿宗賜公主琵琶紋如碧絲貫以真珠雖暴雨
不濡

宣室志

止戈龍

上元初寇天師嘗言止戈龍意謂武后也

千年仙鹿

明皇狩近郊射中大鹿張果曰千年仙鹿也漢武時有生獲此鹿者帝活之且命以銅牌識其年月果於左角上得二小牌

玉清三寶

常舁夢游玉清宮玉清女遺以三寶一曰瑤杯二

曰紅氍毹枕三曰紫玉函

見蝦蟇

李揆未相前忽見一大蝦蟇小鳳占之曰蝦蟇天使
吉兆也未幾拜相

柳將軍

有人於古宅遇柳將軍驗之乃一株枯柳

錦半臂

竇參為御史中丞夢德宗以文錦半臂賜之解

者曰半臂者股肱之衣也公其居股肱之位乎後數
日果拜相

紙月

楊晦之謁王先生先生令其女刻紙狀今宵之月施
于垣上是夕光自東垣發洞照一室八月十二夜也
晦之將去先生以杖畫地視其庭懸崖萬仞有積水
巖谷重疊先生曰陵谷變遷吾子安所歸乎晦之泣
告曰誠不知一日有桑田之變豈仙都瞬息而塵世

已千年乎先生笑曰子無懼吾以為娛耳于是持筭掃其庭有頃如舊晦之乃歸

架梯取月

太和中周生有道術方中秋月色澄清堂有數客來周曰我能挈月入懷袖因取數百筋繩而架之曰我將此梯取月乃閉戶久之客步庭中伺焉忽天地曠黑仰視又無纖雲俄聞生呼曰甚至矣舉其衣出月寸許一室盡明寒入肌骨食頃如初

月圃白瑤宮

李賀卒母夢賀曰上帝神仙之君也近遷都月圃建
白瑤宮以某榮于詞名與文士數輩共為新宮記帝
又作凝虛殿使某輩纂樂章今為神仙中人甚樂
顧夫人無以為念

諸葛後身

韋臯生一月有胡僧見之曰別久得無恙乎嬰兒
若有喜色衆問其故僧曰此子乃諸葛武侯之

後身

平生當食萬羊

李德裕嘗有一僧曰公當萬里南行期在旬日公曰其然果遂還乎僧曰當還公訊其事曰相公平生當食萬羊今所食九十五百矣所以還者未盡五百羊耳公曰吾頃夢行晉山山上盡皆羊有牧者曰此御史平生所食羊也果符師之說後數日振武節度朱暨致書饋四百羊公大驚僧歎曰萬

羊將滿其不還乎旬日貶湖州連貶崖州竟沒于貶所

夢捧日

楊炎少時夢陟高山仰視瑞日紅光赫然因舉左右手以捧之後登相位果協捧日之祥

虹蜺天使

韋臯鎮蜀宴客西亭暴風雨俄頃而霽有虹蜺自空而下垂首筵上吸其飲食且盡其首似驢五

色若霞公懼罷宴小尹豆盧署曰虹蜺天使也降於邪則為戾降於正則為祥公正人也某敢以賀旬日拜中書令

韓退之見神人

長慶四年冬韓退之卧病見一神人被甲仗劍長丈餘立于榻前曰吾有金革事將與卿圖之公曰願聞神人曰威粹骨絕國世與韓為仇今欲討之力又不足卿以為何如對曰臣願從大王討之神人

頷而去乃歎曰是何祥也凡數日窮其理不能究是
冬公卒

白衣吟

華山月夜有白衣丈夫循澗水吟曰澗水潺潺聲
不絕溪隴茫茫野花發自去自來人不知歸時
常對空山月

月夜聯句

梁璟居商山旅館時中秋月朗見三丈夫稱蕭中

郎王步兵諸葛長史與璟坐庭中呼其僮曰玉山人
取酒共酌聯句步兵曰秋月團如鏡中郎曰秋風利
似刀璟曰秋雲輕若絮長史嘿然二人促曰幸以拙
速為事長史沈吟曰秋草細同毛二人大笑曰拙則
拙矣何乃遲乎長史曰中郎為僻韻而滯捷才中郎
又命玉山召蕙娘佐酒頃之一美人至長史戲曰女
郎自赴中郎召且美人曰安知不為衆來乃歌鳳樓
之曲中郎又曰山樹高高影步兵曰山花寂寂香因

指謂長史向者僻韻信中郎過今願續此以觀捷才
長史即曰山天遙歷歷一坐大笑曰遲不能巧速而
且拙捷如是耶璟曰山水急湯湯中郎曰孝廉安知
為詩哉璟發怒震聲叱之坐中客驚遂失所在

曹唐詩

進士曹唐以能詩名世嘗得句云水底有天春寂
寂人間無路月茫茫忽見衣素婦人閑冶徐步吟
賞此句數日唐卒

黑龍甲中出

道宣律師持律第一忽覺手如火燎之狀師驚曰汝
水族也何為潛於此乎即伸臂誦呪已而雷霆擊指
甲有一黑龍自甲中出初甚小俄長丈餘火鬣電眸
攫空而去

黃衣婦人乞命

柳宗元為永州司戶至荆門驛舍夢黃衣婦人曰某
之命若敗縷之懸風危危將斷且飄矣君能活之戴

恩何地明旦荆帥召食以夢語召吏訊之曰前一日
漁人網獲一巨黃鱗魚將為膳今已斷首遂命投江
中是夕夢前婦人來而亡其首

玄陰池

有人見羣僧浴水中問之曰此玄陰池也又曰檀越
可聽吾徒之梵音於是合聲而噪乃羣蛙也

清水珠

馮翊嚴生嘗得一石狀若彈丸後有胡人願以錢三

十萬易之曰此吾西國至寶名曰清水珠自亡此國
之井泉盡濁國人俱病故我越海踰山來中夏求
之即以珠投濁水澹然清徹

蟾蜍

蟾蜍嘗化一白衣美丈夫自言齊人曹氏子

玉龍膏

安南有玉龍膏南人用之能化銀液說者曰此膏若
持北來則禍及韓約都護安南得膏持歸是歲京

師亂約以附鄭注族誅

居士金精

韋思玄求鍊金之術一日有居士辛銳來謁病癰潰血且甚韋方會食居士溺於筵上客怒皆起銳亦告去忽不見回視其溺乃紫金液光采粲然客有解者曰居士金精也驗其名氏信矣

稚川真君

僧契虛游稚川山頂有宮闕在雲物之外殿上有簪

冕者曰稚川真君真君問曰爾絕三彭之仇乎契不能對真君曰不可留此

已酉平蔡

元和初裴晉公征吳元濟至境上因發地得石刻有
鷄未肥酒未熟之語解者曰鷄未肥無肉也肥去肉
為已酒未熟無水也酒去水為酉破賊其在已酉
乎後平蔡果以是日入城

七聖畫

雲光寺有聖畫殿長安謂之七聖畫初制殿宇有少
年詣寺曰某弟兄七人善畫願輸工僧許之七人持
綵繪至戒云七日慎勿啓門僧從其語凡六日閒然
無聞意其為恠遂發其封忽有七鴿望空飛去綵
繪儼若四隅唯西北未竟後畫工見之驚曰神妙
筆也

謝翱詩

云斜月照人今夜夢落花啼動去年春又云愁態


上眉深黛綠淚痕侵臉落花紅

甌杵為妖

建中末獨孤彥者泊舟淮泗步月至佛寺有二丈
夫一人身長黑衣稱姓甲名侵計第五一人身短
青衣姓曾名元黑衣者曰吾之先本盧氏少以剛
勁聞凡物有滯而不通者必侵犯以計忤之時皆
謂我侵計後遇仇易姓甲氏以逃患吾素精藥術
而升降上下即假手於人吾有舅氏起居未嘗不

俱曾元曰吾陶唐氏之後也受姓于姚曾者其子孫
以字為氏故謂曾氏吾素褊躁負氣凌上遭下流沸
騰之謗吾賦性堅正赴湯蹈火矧人之急語未卒寺
僧歸二人馳去不見彥乃悟曰曾元豈非甌乎文以
瓦附曾甌字也名元者以瓦中之畫置瓦字之上甲
侵計者豈非鐵杵乎以午附木杵字也甲者東方甲
乙木也第五者亦假午字也侵計者反語金截截
附金鐵字也總而辨焉得非甌及鐵杵耶明日果

於積壤中得一鐵杵又一甌



類說卷二十三

欽定四庫全書

子部

類說卷二十四

詳校官中書臣張姚成

員外郎臣牛稔文覆勘

總校官檢討臣何思鈞

校對官編修臣盧遂

謄錄監生臣王官

欽定四庫全書

類說目錄

卷二十四

博異志

師曠第七鏡

道士得仙

天柱山梯仙國

舞袖弓寧

剖魚腹得刀

衆花之精

上清童子

巴陵鬼詩

海龍王女

胡二姊

獨異志

商較卿相

狙異志

人魚

天上碧玉樓觀

括異志

南岳赤腳仙人

聖會宮見羽衛

曹門好

醴泉觀

僕射廳

金甲神人叱醫工

汗脚襪

彈鷓鴣

龍首山人

鬼手書草字

母死復歸

正郎鼻

大鼈放生

道士奏章

芙蓉館主

張酒酒

城隍廟求嗣

費孝先範圍

賊濫處斬

鼉恠

屠者到羊

許偏頭

誤食厭物

湖中見船

得父石誌

茅處士叱鬼

截豕一耳

段穀狂吟

類說目錄

欽定四庫全書

類說卷二十四

宋 曾慥 編

博異志

師曠第七鏡

天寶中陳仲躬居洛陽清化里有大井好溺人一日
有敬元穎請謁飾鉛粉衣緋綠衣曰此井有毒龍自
漢居此緣與太乙左右侍龍相得每相蒙蔽好食人
血自漢以來殺三千七百人矣某為龍所驅使為妖

惑誘人共食昨夜已朝太乙兼河南

闕

勘責數日

方回君命匠淘之則脫難矣願終君一生承奉無所
不致仲躬命匠入井獲古銅鏡夜見元頴謝曰某本
師曠所鑄十二鏡中第七者貞觀中為許敬宗所墮
為毒龍所役幸遇君子重見人間明日望君移宅自
此不復見影矣明日牙人來請移居大小價類一如
清化者且云價直契書並交割訖後三日舊井崩堂
遂陷仲躬後有所須皆如移宅之效其鏡背科斗書

曰維晉新公二年七月七日午時首陽山白龍潭鑄
於鼻題云夷則之鏡

剖魚腹得刀

開元中王昌齡舟行至馬當山使風不能駐命贖酒
脯紙馬上大王草履子上夫人詩曰崑崙一面望中
牽奉上大王不取錢只為猛風波浪驟莫恠昌齡不
下船時有金錯刀貯履內誤將往忽有赤鱗入舟
昌齡命烹之剖腹獲刀歎曰葛仙公命魚送書古人

剖經得素頗同也

道士得仙

緱氏仙鶴觀道士皆精專法錄每年九月三日有一道士得仙至其夜皆不扃戶以求飛昇張竭忠為縣令使勇者覘之見一黑虎入觀銜出一道士而去至明並不得仙者竭忠大獵格殺數虎或金簡玉錄或冠帔人髮骨甚多皆每年得仙道士也

衆花之精

崔元徽月夜有青衣引女伴曰楊氏李氏陶氏又緋
衣小女曰石醋醋又報封家十八姨來言詞泠泠有
林下風氣色皆殊絕芳香襲人醋醋曰諸女伴皆佳
苑中每被惡風所撓當得十八姨相比處士每歲旦
與作一朱幡上圖日月五星立苑之東則免難矣今
歲已過待此月二十一日立之崔許之其日立幡東
風刮地折樹飛沙而苑中繁花不動元徽乃悟衆花
之精醋醋乃石榴封姨乃風神也後楊氏輩來謝各

裏桃李花數千云服之可以却老某等亦長生至元
和初元嶽猶在年可三十許

天柱山梯仙國

房州竹山縣陰隱客家浚井千餘尺而無水工人捫
壁別一天地日月世界署牌曰天柱山門內兩童皓
齒垂髮跣足金冠問汝胡為至此工人具陳本末須
臾有緋衣傳勅曰以禮遣之引至清泉洗浴白泉漱
飲甘美似醉行半日有一國城宮室皆金玉城樓題

云梯仙國工人詢曰此國是何處答曰諸仙初得仙者關送此國修行七十萬日然後至諸天或玉京蓬萊崑閬姑射工遂上山尋路門人曰汝來此頃刻人間已十數年欲出舊穴應不可得當奏請通天關鑰匙送卿歸引上天門須臾雲開已在房州詢陰家云已三世矣工人自後不食五穀莫知所在

上清童子

岑文本山亭避暑有叩門云上清童子元寶奉叅冠

青圓角冠衣淺青衣曰自漢得果成本生于吳得不
凝滯之道文本語以漢事了如目睹問冠帔之異曰
僕外服圓而心方正此是上清五銖服又曰六銖尤
細者五銖也出門數步牆下不見文本掘之一古墓
中惟得古錢二枚文本乃悟上清童子銅名元寶錢
丈也外圓心方錢之狀也青衣銅衣也五銖服亦錢
丈也漢朝所鑄也文本自是錢帛日盛至中書令忽
失古錢遂卒

舞袖弓彎

邢鳳寓居長安平康里故豪洞門曲房之地也晝夢
一美人曰此妾家也取綵牋寫陽春曲曰長安少女
踏春陽何處春陽不斷腸舞袖弓彎渾忘却羅幃
空換九秋霜

巴陵鬼詩

劉方元夜宿巴陵古館聞庭中嘯咏之聲一老青衣
曰往年阿郎貶官時令老身騎偏白騮抱阿荊郎墜

卷二十四
損左膊至今天陰酸疼明日必大雨今阿荊郎官高
也不知有老身無昔日阿荊郎愛念青青河畔草
今日綿綿思遠道也明旦果大雨壁上有詩云爺娘
送我青楓根不記青楓幾回落當時手刺衣上花
今日為灰不堪著墨色甚新乃知夜來人題也

海龍王女

許漢陽貞元中舟行于洪饒間日暮尋小浦濡入
行數里不覺到一湖中水纔二三尺湖崖庭宇甚

盛見數女郎飲食皆非人間見者有一樹幹如梧桐
葉如芭蕉紅花滿樹未吐大如斗盎青衣捧一鳥如
鸚鵡置闌干上一聲而樹花皆開芳香襲人每花
中有美人長尺餘管絃悉備女郎舉酒衆樂具作
夜深花落便失所在一女郎作詩曰海門連洞庭
每去三千里十載一歸來辛苦瀟湘水諸女郎曰
欣此旅泊相接恨恨而別明日至濡口訊之曰昨夜
溺死四人撈出其一人似活久乃言曰海龍王諸女

歸洞庭宿此取四人作酒緣客少不多飲我却得來
漢陽問客為誰曰一措大耳漢陽默然覺腹中不安
吐出鮮血數升方知人血為酒三日始平

胡二姊

馬燧貧賤時寓北京謁護戎犯諱庭叱而出燧逃郭
外護戎遣鐵騎追索燧匿于逃民敗室中見一女人
曰胡二姊知君在此故來安慰以灰數斗橫布地上
曰夜半有異物相恐切不得動過此厄後勲業無雙

言畢而去果見一夜又赤髮金牙獐目吐火終不敢
越胡二姊之灰俄聞車馬來戶云馬生必匿于此夜
又奮起噉食人馬殆盡而去燧乃獲免後立大勲官
爵穹崇竟不知胡二姊所在思報不及春秋祠享列
於廟左右

獨異志

商較卿相

明皇幸蜀裴士淹從馬上商較卿相士淹曰姚崇如

何帝曰健者也宋璟如何曰賢而沈者也論十數人皆當其目末問李林甫如何帝曰妬賢嫉能古今無比士淹曰陛下何委用之深也帝俛而無言

狙異志

人魚

待制查道奉使高麗晚泊一山而止望見沙中有一婦人紅裳雙袒髻鬟紛亂肘後微有紅鬣查命水工以篙扶於水中勿令傷婦人得水偃仰復身望查

拜手感戀而沒水工曰某在海上未省見此何物查
曰此人魚也能與人姦處水族人性也

天上碧玉樓觀

九華山樵者婦諸葛氏感時疾數日起白舅姑曰
新婦不唯疾止復且得仙矣俄出門乘空而去又數
日復回云天上樓觀皆碧玉碾成窓戶悉以珠密綴
紋絲帳幔五色相照仙女行明中燃不死之香我今
暫來相看俄有五色車駕雙龍力士御之女童為

從婦乘之冉冉而去

括異志

南岳赤脚仙人

樂史為西京留臺御史嘗夢帝君召俄見宮闕壯麗帝曰而主求嗣吾為擇之少選一人至帝曰中原求嗣汝往勿辭頓首祈免者再三帝曰往哉遂唯唯而去旁拱立者曰此南岳赤脚李仙人也常酣于酒明年果生仁宗

聖會宮見羽衛

聖會宮在洛陽之東祖宗神御在焉嘉祐八年三月二十九日晝漏盡人見羽衛陳布道中最後一人衣赭袍張黃蓋乘馬至宮前不見明日宮門大敞諸殿門鎖不鑰而啓俄頃報仁廟上仙

曹門好

天聖明道京師市井凡物之佳美者即曰曹門好物之高者即曰曹門高仁宗景祐曹王女孫為后王

佐太祖定天下降蜀平吳將百萬之衆未嘗妄殺一人宜乎後裔之興也

醴泉觀

祥符中京師東南隅醴泉湧龜蛇見其側飲之者疾瘳即其地營祥源觀後災再加繕造改號醴泉觀熙寧中薦加修飾命教坊伶人奏樂於庭是日真武影現於殿脊大珠中部從神官旗纛悉具

僕射廳

陳英公執中初以右正言謫監永州酒務一日屋楯間見金字牌書僕射廳字後果至台輔

金甲神人叱醫工

呂公弼申公之次子始申國妊娠而疾將去之醫工陳遜煮藥將熟已二鼓坐而假寐忽然鼎覆再煮再覆又煮而加火焉困甚就榻夢神人披金甲持劒叱曰在胞者本朝宰相汝何人敢加毒害遜懼而寤以白相國後生公弼熙寧中位樞密使

汗脚襪

盛文肅公度忽疾而死越夕乃蘇云為人追入一府見主者云同姓而誤追亟命還歸道中見故相沈義倫曰知公得還為我語家人頗為汗脚襪所苦文肅歸以語其孤不悟汗脚襪之說及服除徹神坐而榻傍有敗襪究其所自乃守靈老卒夜宿偶置于此旦起忘之謂已亡失不復求索

彈鷓鴣

張太寧戢方性惡鷓鴣每挾彈逐之嘗居佛寺有鷓鴣巢于殿之魚尾育二雛羽翼漸成張親彈之而斃大鷓鴣盤空悲鳴不已太寧步庭中一鷓鴣下持其巾一鷓鴣攫傷其髮旬餘創潰而死

龍首山人

前進士楊通與楊寘狀元相善夢寘投刺自稱龍首山人慶厯中登第而卒後人解之曰龍首狀元也山人無祿之稱也

鬼手書草字

馬少保公亮少時臨窓獨坐閱書有大手如扇自窓伸前次夜又至公以筆濡雄黃水大書一草字窓外大呼速為我滌去不然禍及於汝公不聽而寢有頃怒甚索滌愈急公不應將曉哀鳴而手終不能縮且曰公將大貴我戲公何忍致我極地耶公獨不見溫嶠燃犀之事乎公大悟以水滌去草字遜謝而去母死復歸

潘繼宗郎中母亡十年一日忽在堂容狀衣服宛如
平昔曰可於堂西張幃幙中安二榻將與伴我二婦
人息焉又云吾死亦無大過陰官置我一室中不令
他適汝既受朝封我為縣太君乃縱出入今往生冀
州磨房某人家為女因得來此家人日具飲食唯聞
叱飭聲月餘告去舉家送至郊外空中有哭泣聲
正郎鼻

徐郎中少夢神人攜竹籃其中皆人鼻諦視徐曰形

相不薄但鼻曲而小吾與汝易之於簞中擇一鼻削去徐鼻以所擇安之頗覺痛楚神笑曰好一正郎鼻也徐之鼻素不隆正自爾端直厯官正郎

大鼈放生

宋傳慶中舍嘗得數鼈付廚婢臠之其一甚大婢不忍殺放之溝中逾年婢病疫煩熱將卒昇致外舍翌日見胸脇間皆青泥詢之云不知所自但熱差減耳家人伺之夜有大鼈自溝中被體以泥直登婢胸

冰之其病遂愈

道士奏章

范公仲淹倅陳州時郡守母病召道士奏章公笑曰
庸人安能達章帝所耶道士秉簡伏壇終夜不動
試捫其軀則僵矣五更時足微溫良久謂守曰夫人
壽有六年所苦勿慮守問今夕奏章何其久也曰方
出天門遇放明年進士春榜觀者駢道以故稽留
公問狀元何姓曰姓王二名名下一字黑塗旁注一

字遠不可辨既而郡守母病平愈明春狀元乃王拱壽御筆改為拱辰公始歎道士通神也

芙蓉館主

慶曆中有朝士將曉赴朝見美女三十餘人靚粧麗服兩兩並馬而行丁度觀文按轡於其後朝士驚曰丁素儉約何姬之衆耶有一人最後行朝士問曰觀文將宅眷何往曰非也諸女御迎芙蓉館主俄聞丁卒

張酒酒

道士張酒酒得錢即沽酒未嘗一日不醉一旦拂衣
入王屋山立而尸解

城隍廟求嗣

建州有張某無子屢禱城隍求嗣夢神告曰汝夫
婦分當無子我念汝虔禱今以廟中判官為嗣果生
一子名伯玉舉進士第歷官正郎典數郡而卒才藻
廉勁嗜酒不修飾垢貌蓬髮如土偶判官

費孝先範圍

費孝先成都人取人生年月日時成卦謂之範圍復有卦影所畫皆唐衣冠祿位亦唐官次豈非唐之精象者之為歟

賊濫處斬

韓元卿為峽州推官忽揮刀自剄喉雖斷而未死祖擇之時為湖北提刑同年進士也往視之韓不能語但舉手如索紙筆狀因授之書云賊濫分明

罪宜處斬祖命取桑根線縫其創元卿以手褫去
遂卒

鼉恠

潭州樂平橋港有鼉為恠多食人歲有溺死者市
民李姓者弟溺死求屍不得因刺掌血作章夜醮
而焚之夜夢至一處若大府有數吏鐵索繫一物
長數丈如龍而一角目光如電有頃一人下殿呼曰
江鼉肆暴枉害平人決鐵杖一百處死李某不合

以掌血腥穢上瀆高真宜付王碩決脣十五後數年
王碩知潭州李坐遺火伏罪

屠者刳羊

武弁馬仲方有餽牝羊者生一羔仲方鬻於屠肆
翌日將刳而亡其刀良久見刀于溝中取而洗拭既
又失之乃羔羊銜投溝中又以足踐淖中使勿見屠
者視之大感傷自此不復屠羊

許偏頭

成都畫師許姓善傳神一日有貧人敝衣憔悴來求
傳神許笑曰君容狀若此而求傳焉何也其人解布
囊出黃道服鹿皮冠白玉簪頂冠易衣危坐以手摩
面則童顏矣引其鬚應手而黑乃一美丈夫也許驚
曰不知神仙降臨道人曰君傳吾像置肆中有求售
止取千錢後有識者曰此靈泉朱真人也求者輻輳
許貪畫直每像輒取二千夢道人曰汝福有限不可
妄取安得違吾言將促其壽也掌其左頰既寤頭遂

偏自是呼為許偏頭朱真人乃朱居士名雄見唐史
亦見杜光庭仙傳

誤食厭物

張燾龍圖景祐初甲科登第嘗誤食犬肉夢黃衣
使者追至一宮闕一道士曰何故食厭物燾曰非敢
故食誤耳道士曰止此吾為汝言少選出曰可謝恩
引至殿前通曰張燾誤食厭物謝再拜而寤張神
骨清粹襟懷夷曠豈非仙曹之被謫者乎

湖中見船

徐禧學士舟次彭蠡湖水面白霧四起見二朱漆巨
舟旌旗赫奕搖櫓者肅而不譁相去百餘丈而逝又
見朱艦間以金碧相踵而去又見二白艦載甲士數
千戈戟森列尾三舟而行船遠而益小

得父石誌

祖無擇龍圖嘗倅齊州過古河灘沙中得片石上
有數十字乃葬其先人之誌也遣人視墳墓無一

坏之缺竟不測其從來

茅處士叱鬼

劉燧侍郎有別第在襄陽燧卒長子庫部又卒乃
驚其第為茅處士所得夜聞呼曰庫部來俄一人
頂帽從數鬼叱茅曰我第爾何敢據速出無賈禍
也凡三夕至其聲愈厲茅叱曰爾昔為人今為鬼矣
尚恃貴氣敢爾耶若我擅居爾第宜迫我出爾子
不肖不能保其先人舊廬因貸于我尚敢逐我耶言

訖返叱令速出鬼遂遁去

截豕一耳

羅紹漢陽人居近五通神廟隣家歲畜一豕祀神多壞羅之藩籬紹父怒擒豕截去一耳隣人訴于神既而生紹與其孫各無一耳又公安富民見二犬交以刀斷其勢後生二子俱閹

段穀狂吟

段穀者累舉進士後忽如狂市中謳吟云一間茅

屋尚自修治信狂風吹連簷破碎斗拱斜敝看傾倒
牆壁作散土一堆主人翁永不來歸後病死及葬發
視但棺耳

類說卷二十四